

أنا والحروف

أنا والحروف

حتى وأنا

مليان وجع

ناحت قصيدي

جوه قلبي ورافض الكلام

رافض شروط الإنهزام

شایل حروف القصيدة

فوق كتافي

من يوم ما وعيت ع الدنيا

وعاهدت نفسي

وحالف لوفي بالقسم

باني جدار عالي لقصيدتي

زي بنيان الهرم

لا سمح الله

لحد يغلط في الحروف

يدخل وما يسميش

وما يصليش كمان عليه

أنا أصلي بإيديا بنيه

محروس ومحمي م الإله

زي بنيان الحرم

يعني لما تدخل للحروف

سمي وصلي ع النبي

وقول ماشاء الله عليه

ناظم قصيدة للحروف

وسايبنا بنموت ياولد

طب قول قصيدة للولاد
أو قول قصيدة للبلد فيها غزل
تحنن قلب المسئولين
على شعب بيحك التراب
وحالته أعجب م العجب
يابوي خلينا بعيد السياسه
لو هناكل عيشنا حاف
صحيح فيه ناس
مش لاقيه للرغيف
وناس في برد الليل بتحلم بالدفا
يابا خلاص
ماهي بقالها
م السنين مليون سنه
سرقه ونهب م الخزائن

لحد قال ليهم كفايه
ولا يوسف الصديق زعل
فرعون حاكمها م الأزل
والشعب تحت رجليه خدم
كما العبيد ومش جديد
خلينا بالله يابوي نعيش
فقدت م الولدان كتير
وما عدش فيك الحيل
تغني وتقول يا ناعسه انهضي
ناعسه خلاص
رابطه ولادها بالحديد
ومجهز الهم الكفن
عشان مولانا الفرعون يعيش
لازم يموت نص البلد

واللي مش عاجبه الحال يغور
واقفين في وش الموت طابور
فاكر يابوي ابن اخوك محمدين
وهو جاي في القطر مات
وابن عمي الشاويش محمد
ع الحدود طخوه ومات
ومينا ابن غبريال
جوه الكنيسه فجروها
وبرضه مات
حتى لما قلت أشجع
وانسى همي في الملاعب
شفت موتي وصاحبني اللي
كان بيشجع جنبي مات
ومحروس ولد الشيخ عطيه

لما ضاق الحال وهاجر
غرقت بيه المركبه وفي البحر مات
وناعسه نايمه
مش حاسه بولادها اللي بيموتوا
ولا حاسه بالسوس
اللي بينخر عظمها بس بسكات
وعايزني أقول الشعر فيها
وأغزل حروف الفرخ في الموالم
يابا خلاص الحروف تمت حزينه
والصبر فوق الصبر طرحه مال
وأنا خلاص
معدش فيا الحيل لضلمة سجون
جواها الموت أصبح حلال
جواها الموت أصبح حلال